

БІЛІМІН ОЗЫҚ ТӘЖІРИБЕМЕН ҰШТАСТЫРҒАНДАР ЕЛІМІЗДІ АЛҒА ЖЕТЕЛЕЙДІ

Ел егемендігін алып, көк байрағымыз желбіреп, еліміздің «Қазақстан» деген атпен бүкіл әлемге танылғанына 31 жыл толды. Тәуелсіздігімізді жариялағаннан бері елеулі табыстарға қол жеткіздік. Еліміздің тыныштығы мен қауіпсіздігі, көпұлтты Қазақстан халқының жарастығы мен ынтымақтастығын ең басты құндылығымыз деуге болады.

«Терең білімін озық тәжірибемен ұштастыра білген азаматтар елімізді алға жетелейді» - деп мемлекет басшысы Қасым-Жомарт Тоқаев айтқандай, қазіргі жастардың оқуда озат, әлем жаңалықтарынан құлағдар, дамыған елдер қатарында көш түзейтін елі үшін барын салуы оларға артылған міндет деп білеміз. Ол үшін әрқайсысы дұрыс таңдау жасап, болашаққа деген нық қадам басулары қажет.

Жарқын болашақ құру ең алдымен тәрбие-тәлімнен, үлкен білімнің арқасында болатыны сөзсіз. Жарқын болашаққа қадам жасау кішкентай дүниелерден басталады. Мысалы, уақытымызды пайдалы өткізгіміз келеді, ол үшін ертеңгі күнге белсенді жоспарлар жасап, биік мақсат қою керек. Алға қойған ұлы мақсаттары бар, ертеңіне сеніммен қарайтын, жастары алғыр, жаңалыққа жаны құштар, рухы биік ел ғана мәңгілік ел болып ғасырлар бойы жасайды.

Жарқын болашақ деген не? Ол – білім алып, білімді оң іске салып соның қызығын жылдар бойы көру. Одан кейін саналы ұрпақ тәрбиелеп оларға түзу жол көрсету. Ұрпағын салиқалы болса одан асқан бақыт болмас, салиқалы ұрпақтың болашағы да берекелі болатыны сөзсіз. Әрбір жақсының қайыры бар, сол себепті жақсы іспен айналысып болашағымызды өз қолымызға алғанымыз жөн. Бұл, әсіресе, жастарға үлкен үндеу.

«Болашақ – жастардың қолында» деген қанатты сөз көптеген жастарымыздың алға ұмтылуына, мақсат қоюына, сол мақсатқа жетуге деген құштарлығының оянуына себепші болған ғажайып бір асыл сөз. Яғни, жастарға ел сенін, үміт артып отыр. Осыны сезініп, үмітті ақтай білсек, еліміз үшін бұл үлкен қуаныш. Жастарға мақсатқа жетер жолында тұрған ең маңызды таңдау – мамандық таңдау деп білеміз.

Еліміздің алдыңғы қатарлы оқу орындарының бірі – М.Әуезов атындағы Оңтүстік Қазақстан университеті. Әлемдік мәдени құндылықтар үлгісімен алмасып, еліміздің бейнелеу өнері және дизайн бағыты бойынша мәдени әлеуетінің жоғарылауына өзіндік үлес қосып, білікті мамандар даярлауда университетіміздегі «Мәдениет және өнер» факультетіндегі «Бейнелеу өнері және дизайн» кафедрасы жылдар бойы үлес қосып келеді. Кафедрамыз-

дың білімі мен сапалық көрсеткішін арттыруда кафедра меңгерушісі, философия ғылымдарының кандидаты, доцент Д.С.Болысбаевтың еңбегі орасан зор.

«Мәдениет және өнер» факультеті мәдениет, өнер, педагогика мамандықтары бойынша бұрынғы Әл-Фараби атындағы Шымкент педагогикалық мәдениет институты мен М. Әуезов атындағы Шымкент педагогикалық институтының базасында құрылған.

2021 жылдан бастап «Мәдениет және өнер» факультетінің деканы болып п.ғ.д., профессор, Қазақстанның педагогикалық ғылымдар Академиясының академигі, ҚР жоғары оқу орындарының үздік оқытушысы, ҚР Дизайнерлер Одағының мүшесі Медеубек Жұматайұлы жұмыс істейді.

Факультет түлектері Қазақстанның барлық өңірлерінде, жақын және алыс шет елдерде еңбек етеді. Көптеген оқытушылар халықаралық және республикалық конкурстардың жүлдегерлері, «ЖОО-ның үздік оқытушысы» ҚР Мемлекеттік гранттарының иегерлері, «ҚР Мәдениет қайраткері» атағының иегерлері болып табылады. Оқу процесі мемлекеттік білім беру стандарттарының талаптарына сәйкес заманауи білім беру технологиялары бойынша ұйымдастырылған. Студенттерді жоғары мектепте кредиттік жүйе бойынша оқыту үшін кітап қорын оқу-әдістемелік әдебиеттермен толықтыру, оқыту, ақпараттандыру және оқу процесін компьютерлендіру процестеріне жаңа инновациялық технологияларды енгізу бойынша жүйелі жұмыс жүргізілуде.

Ертеңгі болашағына нық сеніммен қарап, анық қадам басуына, мәдени-саяси реформаларды қоғам мүддесі үшін дамытуына үлес қосам деген жастарға М.Әуезов атындағы Оңтүстік Қазақстан университетінің алдыңғы қатарлы сап түзеген «Мәдениет және өнер» факультетінің «Бейнелеу өнері және дизайн» кафедрасының есігі ашық!

М. ЖАҚЫПБЕКОВА,

Г. МҰРАТБАЕВА,

С. НҰРИДИН,

**Мәдениет және өнер
факультетінің «Бейнелеу
өнері және дизайн»**

кафедрасының оқытушылары